

O Le Faaliliuga a Iosefa Samita

Na toefuatai mai e le Alii aoaoga faaopoopo e ala i le Faaliliuga a Iosefa Samita o le Tusi Paia.

E mafai ona e maua le tusi a Mose i au tusitusiga paia? Na toefuatai mai e le Alii le malamalama faaopoopo e ala i Faaliliuga a Iosefa Samita, e aofia ai faaaliga vaaia ma aoaoga a Mose ma isi. O loo i ai nei mea i le Tusi a Mose i le Penina Tau Tele.

Faitau le Mose 1:3–4, 6,8, 39. Vaavaai mo mea na aoaoina e Mose e uiga ia te ia lava ma le Alii i le taimi o ana faaaliga vaaia. (E mafai foi ona e saili mo fuaiupu e [te] fiafia i ai i le Tusi a Mose.)

- E mafai faapefea e aoaoga o i nei fuaiupu ona fesoasoani ia i tatou a o tatou taumafai e mulimuli i le Faaola?
- Aisea e ono lagona ai e se tasi le lotofaafetai mo mea na faaali mai e le Alii i nei fuaiupu?

Na toefuatai mai e le Alii upumoni “manino ma taua ” e ala i le Faaliliuga a Iosefa Samita.

Pe ua e faalogo ea o nisi o upumoni taua atonu o misi pe le o manino i le Tusi Paia? O le Tusi Paia o se tusi faatuatua ma musuia. Peitai, na aoa mai Nifae e faapea o nisi o “mea manino ma taua” o loo misi pe le manino (1 Nifae 13:28–29). Mo se faataitaiga, o le papatisoga e le o ta’ua sa’o mai i le Tusi Paia scia oo i le Feagaiga Fou, ma o le tala faatusi paia a Noa e le o faamalalama mai ai sa lapataia e le Alii ia tagata ma tuuina atu ia i latou se avanoa e salamo ai a o lei auina atu le lolo.

Faitau le Mose 6:64–66; 8:16–17, 20 e vaai pe na faapefea ona toefuatai mai e le Alii upumoni taua i le Faaliliuga a Iosefa Samita.

- E mafai faapefea ona fesoasoani ia i tatou i aso nei le iloa o le papatisoga o se poloaiga talu mai aso o Atamu?
- E mafai faapefea ona fesoasoani ia i tatou le iloa e valaaulia pea i tatou e le Alii ia salamo ma naunau e faamagalo i tatou?
- E faapefea ona fesoasoani nei upumoni e taitai atu ai i tatou i le faaolataga e ala ia Iesu Keriso?

O faaaliga a le Alii i le Faaliliuga a Iosefa Samita na taitai atu ai i isi faaaliga i le Mataupu Faavae ma Feagaiga.

Pe na fesoasoani ea le suesueina o tusitusiga paia ia te oe e maua ai faaaliga faaopoopo? Sa faia mo Iosefa. E lei leva ona ia aoaoina i le faaliliuga musuia e uiga ia Enoka ma lona nuu i le faatuina o Siona (tagai Mose 7:18–21), sa faaali mai e le Alii ia faatonuga ia Iosefa e fesoasoani ai i le Au Paia ia avea ma tagata o Siona (tagai Mataupu Faavae ma Feagaiga 38, 42, 45).

O le isi faataitaiga o leni mea na tupu ina ua faaliliuina e Iosefa Samita ma Sini Rikitone le Ioane 5:29. Sa i ai ni a lau fesili e uiga i le lagi ma seoli lea na taitai atu ai i se faaaliga ofoofogia ua tusia nei i le Mataupu Faavae ma Feagaiga 76. O leni faaaliga na aofia ai upumoni e uiga i tikeri e tolu o mamalu e mafai e tagata ona mautofi ai pe a mavae leni olaga.

Faitau le Mataupu Faavae ma Feagaiga 76:22–24, 50–53, ma le 58–62, ma maka mea ua e aoaoina e uiga ia Iesu Keriso ma pe mafai faapefea ona tatou toe foi atu e mau faatasi ma Ia ma le Tama Faalelagi.

- O a upu po o fasifuaitau na e faailogaina? Aisea?
- Aisea e ono lagona ai e se tasi le lotofaafetai i le iloa o nei upumoni?

Na tuuina mai e le Alii le manino faaleaoaoga faavae ma malamalamaaga faaopoopo i fuaiupu o le Tusi Paia e ala i le Faaliliuga a Iosefa Samita.

E ese mai i le Penina Tau Tele, e te iloa le mea e maua ai Faaliliuga a Iosefa Samita o le Tusi Paia? E tele o loo maua i Filifiliga mai le Faaliliuga a Iosefa Samita o le Tusi Paia i tua o tusitusiga paia po o le itulau o Mea Faaopoopo o

le Faaliliuga a Iosefa Samita o loo maua i le vaega o le Study Helps i le polokalama o le Gospel Library. Aoao pe faapefea ona faaoga nei punaoa e ala i le tilotilo i le faataitaiga ma le faamalamalama o loo i lalo.

**VAEGA NA FILIFILIA MAI LE FAALILIUGA
A IOSEFA SAMITA O LE TUSI PAIA**

O vaega ua ta’ua i lalo na filifilia mai le Faaliliuga a Iosefa Samita o le Tusi Paia a le Tupu o Iakopo (FIS). Na musuia e le Alii le Perofeta o Iosefa Samita e toe fuatai upumoni i le Tusi Paia na aveesea pe na suia mai uluai upu na tusia ai i le amataga. O le toe fuataiina mai o nei upumoni ua faamanino ai mataupu faavae ma ua faateleina ai le malamalama i tusitusiga paia. O mau ua filifilia mo le Taiala o le a fesoasoani e faateleina ai lou malamalama e tusa lava po o le a le gagana ua faaliliu i ai.

Talu ai ina sa faaali e le Alii ia Iosefa ni isi o upumoni faapitoa na tusia e uluai tusitala, o lea ua tulaga ese ai lava le Faaliliuga a Iosefa Samita i soo se isi lava faaliliuga o le Tusi Paia i le lalolagi. I lenei tulaga, o le upu *faaliliuga* o loo faaogaina i se uiga loloto ma le tulagaese lava nai lo le ala e masani ai, auā o le faaliliuga a Iosefa na sili atu le tele o faaliga na aofia ai nai lo le faaliliuga sa’o mai lava i le tasi gagana i le tasi gagana. Mo ni isi faamatalaga e uiga i le FIS, tagai i le “Faaliliuga a Iosefa Samita (FIS)” i le faasologa o autū i le alafopeta i le Taiala.

O faamalamalama ua ta’ua i lalo ua faaali atu ai le faataitaiga o se mau ua filifilia mai le FIS:

O le mau lenei o loo i mataitusi olaola—o le mau lena i le faaliliuga a Iosefa Samita o le Tusi Paia a le Tupu o Iakopo. Ona o lana faaliliuga ua toe fuataiina ai upu i mau o le Tusi Paia, atonu e ese numera o fuaitupu mai le Tusi Paia o loo e faaogaina.

FIS, Mataio 4:1, 5–6, 8–9 (faatusatusa i le Mataio 4:1, 5–6, 8–9; e faapea foi suiga na faia i le Luka 4:2, 5–11)

(Na taitaiina Iesu e le Agaga, ae lē o Satani.)

1 Ona aveina ai lea o Iesu e le Agaga, i le vao, ina ia faatasi ai ma le Atua.

5 Ona ia aveina ai lea o Iesu i le aai paia, ma sa tuu ai o ia e le Agaga i luga o le tumutumu o le malumalu.

6 Ona sau ai lea o le tiapolo ia te ia ma faapea atu, Afai o oe o le alo o le Atua, inā oso ia oe i lalo: aua ua tusia, o le a la tuuina atu i ana agelu le vaai mo oe: ma o le a latou tauaveina oe i o latou lima, ina nei tu’ia lou vae i se maa i soo se taimi.

8 Ma sa toe aveina Iesu e le Agaga, ma sa aveina a’e o ia i se mauga e matuā maualuga lava, ma sa faaali atu ai ia te ia malo uma o le lalolagi ma o latou mamalu.

9 Ma sa toe sau le tiapolo ia te ia, ma faapea atu, O nei mea uma o le a ou tuu atu ia te oe, pe afai e te pa’ū i lalo ma ifo ia te a’u.

O le faamatalaga o i totonu o puipui-afamasina o le mau lena o loo i ai i lau Tusi Paia e tatau ona e faatusatusaina i le Faaliliuga a Iosefa Samita.

O le faamatalaga lenei ua faamalamalama mai ai le mataupu faavae na faamanino mai e Iosefa Samita i lana faaliliuga.

O le mau lenei e pei ona faaliliuina e Iosefa Samita.

I nisi o gagana, o fuaitau o le Faaliliuga a Iosefa Samita e mafai ona maua i vaefaamatalaga o le lomiga a le Au Paia o Aso e Gata Ai o le Tusi Paia po o le “Anotusi Fesootai” i luga o masini tekinolosi.

Faitau fuaitau nei i le Tusi Paia, ona faaoga lea o Faaliliuga a Iosefa Samita e faailoa ai suiga musuia.

Ioane 1:16–18 (Faaliliuga a Iosefa Samita, Ioane 1:16–19)

Ioane 4:24 (Faaliliuga a Iosefa Samita, Ioane 4:26)

Ioane 6:44 (Faaliliuga a Iosefa Samita, Ioane 6:44)

- O a ni mea o aoao atu e nei suiga musuia ia te oe e uiga ia Iesu Keriso?
- Aisea e ave ai o se faamanuiaga le malamalama atili ai i nei mea?